


A *rubá***A** *ntaño*

Nos a caba di despedi di un aña bieu y cada ken tabata duna e bon aña 1991, un deseo cual a ser expresa na cada un cu nos topa cune. E aña ta sigui pasa y ta converti den siglonan, pero ningun ta bolbe. Nan ta manera e wijzer di un holoshi cu semper ta cana adilanti, nunca ta bolbe na e tempo cu e ta laga atras. Pero cada

un di nos si ta conserva e pasado den nos mente, e computer inigualable cu nos a nace cune danki na e maravilloso obra di nos Señor pa cu humanidad. Y Aruba tambe tin su pasado, su añanan di antaño, cual ariba un fin di aña y dentrada di un aña nobo, semper ta manera nos ta primi un di e teclanan di nos computer y esaki ta trece pa nos algo di nos añanan di antaño.



Awe nos kier ilustra y corda Aruba di Antaño, particularmente riba e dianan di fiesta di Pascu y di Aña Nobo cu nos a laga tras di lomba. Nos kier ilustra e Fornu di Kalki aki, pasobra den dje tin encera recuerdos y un gran di nos Aruba di Antaño ora cu ta trata y loke ta haci, casi bo ta bisa cu e instinto di carne, esta di verf cas pa ricibi Pascu y Aña Nobo. Pero e fornu aki den e Aruba di Antaño tabata e fuente cu tabata percursa pa tur e casnan haya un flux nobo, esta di ser blancha, cual ta e palabra corecto, ora cu ta blancha cas y demas edificionan riba nos isla.

Cuanto recuerdo e Fornu aki ta trece na nos mente di su tempo valioso y importante, cual el a presta den e Aruba di Antaño. E fornu di kalki tabata esun cu a percursa pa tene e casnan limpi y bunita. Awe e ta nomas un loke e turistanan ta yama "Landmark", mescos cu e Willem III Toren. Cada un di e cosnan aki ta un monumento di nos historia, di nos pasado, di nos dushi tempo di Antaño.

Kico ta kalki? Kalki ta ser produci door di kimamento di coral. E historia di e produccion di kalki ta grandi, tanto aki na Aruba como na Corsow y Bonaire. Una vez cu nos kima e coral y despues pone un ala di aloe den dje, esaki ta bira e kalki pa e casnan di Aruba cuminsa blancha. Mayoria ta hacie durante e temporada di Pascu y Aña Nobo. Tambe ta di menciona cu di e parti laboral, hopi hende a bira malo tambe pa falta di seguridad y hasta fallece di un terrible enfermedad cu den e tempo di antaño no tabata conoce cura, y esey tabata e pas-mamento y e tuberculosis.

Pa falta di conocimiento di e valor di e cosnan aki hopi di loke ta nos historia y nos añanan di Antaño ta bay perdi. Tal manera e waf di Eagle, hasta e San Pedro Hospital, e Forti Zoutman y varios otro cual na su debido tempo nos lo trece na conocimiento di e Aruba di Antaño. Semper nos ta menciona cu for di chikito nos tin cu hereda tur loke ta di nos pais, esta e historia, su costumbre, su folklore, pa cu di e manera aki e por yega na stime mucho mas.

Bo matutino DIARIO ta sinti su mes orguyoso di por complace su lectornan y juventud cu e columna nobo aki pa cu e aña nobo di 1991.